



Chê matine Svualdin si jere sveât di binore e al jere partît par lâ a fâ lens tal Cormôr. Al veve cun sè la gulizion intun scartossat di trê francs: *scaloppette*, *scaloppine*, saio jo cemût che si clame chel formadi? ... ah! *Scamorza*! Ducj in paîs lu cjapavin par “velu-velu” parcè che al jere un pôc ritardât e ancje pe sô condizion di vedran.

La Muart e jere partide ancje jê a binore ma di Udin. La Muart e veve fat gulizion cuntun bevaron fat cun chês robis modernis di cumò... mi à dit gno nevôt... *taurina*, *ercolina*, *hulkina*...

Svualdin al veve une vecje Torpado mieze rusine e cu lis mantiis di cuar. Le veve pene piturade cuntun lavôr “a cjandele” ven a stâi al veve brusât la vernîs frescje fasint des riis e cussì e sameave a une tigre.

La Muart e veve une biciclete di titanio che e valeve 4000 euros e, in grazie dal bevaron, e jere za a Pagnà.

Svualdin al veve bielzà peât la prime fassine di lens bogns par piâ il fûc cuant che, inte Ipovie, a retis di Cjastelîr e rivà la Muart!

Svualdin al fasè apene in timp a viodi la Muart: chel coredôr cuntune strane divise cul disen di un SCHELETRO! Il coredôr al jere in bombe! A 70 a la ore... no si sarès fermât par un puaret cuntune vecje Torpado.

“Adiudiudiu... ma isal mat?” al pensà Svualdin e si butà viers il cjamp par evità il ciclist ma si inçopedà colant cu la muse ta lis gjambis di blave taiadis di pôc e... nie, si svuarbà un voli, ma la muart i passà su la schene e no si inacuarzè nancje di lui.

Di chê volte, a ducj chei che i domandavin cemût che si jere svuarbât, Svualdin al

rispuindeve: “ah, jesus! Miôr vuarps che la biciclete!” e ducj a pensavin che al fos diventât ancjemò plui mat, ma savìn ben nô che no je vere!!!

di Milio dai cjans